



Publicaziuns dalla vischnaunca, jamna 47

Votaziun communal

L'urna principala en casa communal ei aviarta sco suonda:

Sonda, ils 28-11-2015, 18.30–19.30
Dumengia, ils 29-11-2015, 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediatamein, denton **sil pli tard entochen venderdis, ils 27 da november 2015 allas 17.00** tier l'administraziun communal (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar e metter quels en la cuviarta da votar grischa e serrar giu ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (**supplicau da francar**) ni directamein fierer en la scaffa da brevs dalla casa communal.

Il cedel da votar sto esser sil pli tard la sonda, ils 28 da november 2015 allas 12.00 tier l'administraziun communal.

Il certificat dil dretg da votar ei da suttascriber. **Senza Vossa suttascripziun cun agen maun ei la votaziun nunvaleivla.**

Suprastonza communal

Lenna da brisch

A Denter Reins (dadens il Rein dalla Stalusa) sut la lingia da tensiun aulta ha il menaschi tecnic pinau ogra che periclitava il conduct electric. Interessents per quella lenna da brisch ein supplicai da s'annunziar a scret tier il selvicultur communal, Simon Cathomen, caum postal 57, 7180 Disentis/Mustér ni per e-mail; uaul@disentis.ch.

Uffeci forestal Disentis/Mustér

Baselgia claustrala s. Martin

En connex cun la renovaziun dalla baselgia s. Martin dalla claustra da Mustér ein mesiraziuns dil tuchiez planisadas. Duront in suentermiezdi vegnan differentas cumbinaziuns da tuchiez registradas. Las mesiraziuns ein necessarias per controllar l'influenza dil tuchiez sin la statica dallas tuors.

Datum: **mesjamna, ils 25-11-2015**, ca. 13.30–17.30

Datum da reserva: mesjamna, ils 2-12-2015 dallas medemas uras.

Engraziel fetg per Vossa capientscha.

Claustra da Mustér

Controlla da habitonts

Naschientschas

Urgast Julia, naschida ils 8 da november 2015, feglia da Simona Candinas ed Andreas Urgast



Lutz Lena Joline, naschida ils 12 da november 2015, feglia da Helen e Roger Lutz-Riedweg

Parcadi sutterran a Sogn Gions

Affittaziun

El sutterran dil center da sanadad Puntreis dispona la vischnaunca da 13 parcadis. Quels san vegnir affittai permanentamein. Actualmeins stattan aunc a disposiziun entgins parcadis. La supras-tonza communal ha da niev fixau il tscheins meinsil d'affittaziun a frs. 120.–. Ils parcadis san vegnir affittai naven d'immediat ni tenor convegnientscha.

Interessents che giavischan d'affittar in parcadi ein envidai d'annunziar lur interess a scret agl uffeci da baghegiar, caum postal 57, 7180 Disentis/Mustér ni per e-mail: baghegiar@disentis.ch.

Suprastonza communal

Dascha pégn per il temps d'advent

A Cuoz sil plaz da lenna sper il stradun metta il menaschi tecnic a disposiziun dascha pégn. Tgi che fa diever da quei survetsch sa retrer quella naven dad immediat. In bi temps d'advent giavischa

Menaschi tecnic Disentis/Mustér

Sezs/posts da catscha e tegias da laghetg pil diever da catscha

Tenor disposiziun dalla vischnaunca e dalla survigilonza da catscha ein tegias da laghetg e posts/sezs da catscha d'annunziar als organs communal. El decuors da quest atun ei vegniu constatau che buca tuts posts da catscha installai il davos temps ein vegni annunziai. La supras-tonza communal supplichescha perquei in e scadin catschadur d'indicar ses sezs cul formular official. Il formular sa vegnir retratgs dall'administraziun communal ni via internet www.disentis.ch/Downloads/Menaschi_tecnic ed ei d'inoltrar entochen ils **30 da november 2015** all'administraziun communal, caum postal 57, 7180 Disentis/Mustér.

D'annunziar ein tuts posts da catscha aunc buc annunziai. Quell'obligaziun vala per tut ils sezs ad ault, posts giun plaun e tegias da laghetg. Las annunzias vegnan integradas egl inventari dils objects erigi per gronda part sin terren public. Per posts da catscha che vegnan postai sin terren privat basegna ei il consentiment dil proprietari da terren. Ils sezs e las tegias da laghetg che vegnan buca annunziai vegnan allontanai entras ils organs communal ed ils cuosts persuerter adossai als possessurs.

Suprastonza communal

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica.

Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu).

Quellas lavurs ston esser finidas sil pli tard entochen la **fin da november 2015**. En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietari.

Disentis/Mustér, october/november 2015

Uffeci da baghegiar Disentis/Mustér



Scola populara Mustér

Cun l'entschatta november 2015 ha nies meinascola Kai Hinrichsen abdicau sia piazza sin la finiziun digl onn da scola 2015/16. Per la lavur ed igl engaschi prestau lessen nus haver engraziu grondamein.

Il cussegl da scola ha eligi Roger Tuor sco niev meinascola. Roger Tuor ha acquistau la primavera vargada il dipolm da meinascola. Nus giavischein a Roger bia plascher e satisfacziun en sia nova sfida.

Per il pensum parzial sco persuna d'instrucziun dil scalem superiur, ha il cussegl da scola eligi Kai Hinrichsen. A Kai giavischein nus cuntentientscha e bia plascher cun siu niev pensum.

16-11-2015 *Il cussegl da scola Mustér*

Schubergiar e rugalar igl aparat d'udida

Gliendisdis, ils 23 da november 2015 saveis Vus schar schubergiar e rugalar Vies aparat d'udida:

9.15–10.15 *en Casa sogn Martin a Trun*

10.45–11.30 *en Casa sogn Giusep a Cumpadials*

13.30–15.15 *el Puntreis, Center da sanadad a Mustér*

Las firmas Amplifon ni Jäggi da Cuera/Glion, cun Arthur Jacomet, fan quei survetsch per tuts interessents gratuitamein. Ei drova negina annunzia.

Uniun da giuventetgna Gonda-Dulezi-S. Gions

Sontgaclau e sia suita selegran da puspei astgar visitar pigns e gronds. Uonn vegn quei ad esser sonda, ils 5 da december 2015. Sontgaclau ei denton vegnius moderns. El ei uss cuntonschibels per e-mail sut l'adressa: sontgaclau@ugg.ch ni per tel. 076 393 21 02. Ils habitonts da Gonda-Dulezi-S. Gions che retscheivan bugen sia viseta a casa ein supplicai da s'annunziar tochen ils 20 da november 2015 cun far las indicaziuns usitadas.

Era uonn envida Sontgaclau pigns e gronds ad in sitg cauld suenter messa (plaz avon garascha dalla famiglia Huonder-Flury).

Sontgaclau e sia suita engrazian per la collaboraziun e selegran sin bialas sentupadas

UGG

Uniun samaritana Mustér

L'acziun da dar saung per donaturas e donaturs dallas vischnauncas da Medel e Mustér ha liug **gliendisdis, ils 23 da november 2015** dallas 18.00– 20.00 en halla Cons.

Nus engraziein grondamein per quei bien survetsch en favur da malsauns e disgraziai e sperein sin ina stedia participaziun.

Cordial beinvegni *Uniun samaritana Mustér*

Cuors da far tschupials d'advent

Gievgia, ils 26 da november 2015

Nus decorein tschupials d'advent. Ils tschupials vegnan formai sin in plumatsch da mescal. Il



cuors che cuoza duas uras vegn menaus atras da florista e pura Cornelia Berther-Oberholzer.
Emprem cuors allas 13.30–16.00
Secund cuors allas 20.00–22.00

Annunzias entochen ils 19 da november tier Cornelia Berther tel. 081 949 13 74, 077 491 22 85,
e-mail: baseli.berther@kns.ch

Vernissascha e concert

Venderdis, ils 27 da november 2015

Vernissascha cun apero allas 19.00. Fotografias da Karin Wachter, fotografa da Basel, viva e lavura dapi tschun onns a Cumpadials. Cuntradas vastas dalla Surselva e detagls da cuntradas formeschan il coc dall'exposiziun da fotografias. Cuorta introducziun dalla exposiziun ed apero. Concert allas 20.30 – Ursina Unic, la vusch dalla cantadura Ursina da Mustér, specialmein impressiunont ein ses texts romontschs.

Tribuna libra per Ursina!

Center sursilvan d'agricultura Salaplauna, vernissascha 19.00, bar naven dallas 20.00, concert allas 20.30. Collecta.

Cordial beinvegni! www.agricultura.ch

Uniun da dunnas Mustér

A caschun dalla beinfrequentada radunonza extraordinaria dils 13 da november 2015 han las commembras acceptau unanimamein il niev organigram resp. la reorganisaziun dall'uniun. El futur dat ei buca sutgruppas, mobein plirs ressorts ed ei dat ina suletta contabilitad per l'entira uniun. La lavur schai sin pliras schuvialas, quei che dat pli bia libertad, denton era dapli responsabladad allas dunnas che s'engaschan. Las commembras han elegiu lur suprastonza. Da quella fan part: Katrin Pally, presidenta, Christina Làbas, co-presidenta e Rita Furger sco cassiera. Ellas surprendan lur incarica cun l'entschatta schaner 2016.

Igl ei stau ina legrevla radunonza. Ussa eis ei da sperar che biaras dunnas demuossien interess cun separticipar allas purschidas. Ina nova entschatta ei dada e nus quintein cun ina buna continuaziun. Quella responsabladad porta denton mintga dunna da Mustér.

La nova suprastonza

Fiera da Nadal 2015

En connex cun la reorganisaziun dall'Uniun da dunnas Mustér, eis ei semussau ch'ei va a liunga vesta mo cun ina collaboraziun regiunala. Aschia han las suprastonzas dallas uniuns da dunnas da Medel, Mustér e Tujetsch decidiu da menar atras la fiera da Nadal annuala mintgamai alternont en in liug. Aschia ha la fiera d'uonn liug comunablamein sonda, ils 21 da november 2015 a Sedrun (dallas 14.00–20.00 uras), il 2016 a Curaglia e 2017 puspei a Mustér. Luvrar ensemen, trer vid il medem sughet, nezegiar las sinergias portan il success, da quei essan nus perschuidas. E tgisà – forsa gartegi egl avegnir da colaborar aunc tier ulteriuras activitads?

La suprastonza

Sentupada d'advent cun bazar

Dumengia, ils 29 da november 2015 ha liug el Puntreis Center da sanadad a Mustér naven dallas 13.00– 17.00 ina sentupada d'advent cun in bazar cun products da nos cussadents.

Cordiala invitaziun



Cussadents dil Puntreis Center da sanadad

Radunonza generala dalla gruppa da puras

Disentis/Muster, **gievgia, ils 3 da december 2015**, allas 20.00 el hotel Rätia.

A stedia participaziun envida *la suprastonza*

Sontgaclau da Segnas/Acletta

Sontgaclau viseta ils **5 da december 2015** las famiglias da Segnas e d'Acletta. Per che Sontgaclau stoppi buca star avon escha serrada e spitgar vegn supplicau da s'annunziar sche Sontgaclau astga era vegnir a visitar Vus. Ils organisaturs ein zun engrazieivels sche Vus tarmetteis gia ordavon enqual cavazzin sur dils presents, en special sur dils affons.

Igl oremus vegn prelegius la sera da Sontgaclau allas 21.00 ella baselgia ad Acletta ed allas 23.00 ell'ustria Cresta a Segnas. Ei fagess grond plascher d'astgar beneventar ina gronda raspada convischins e convischinas.

Las annunzias ed ils cavazzins saveis bugen tarmetter entochen ils 4 da december 2015 sin la suandonta adressa: Rafael Maissen, Via Acletta 22, 7180 Disentis/ Mustér, ni per mail sin: rafaelmaissen@bluewin.ch

Cordial engraziament

Uniun da giuventetgna Segnas-Acletta

Sontgaclau da Funs – Latis – Clavaniev

5-12-2015. Sco usitau s'entaupan ils vischins e las vischinas da Funs, Latis e Clavaniev suenter messa da Sontgaclau, vid las 17.00 el curtin dalla Villa. Plinavon dat ei era uonn in program spezial pils affons.

Per dapli informaziuns: Aurelia Flepp; 076 533 83 60. Bugen fa il Sontgaclau era ina viseta tier Vus a casa. Sontgaclau Clavaniev: Fadri Huonder, fadri.huonder@me.com e Funs e Latis: Adrian Huonder, adrian93@gmx.ch. Nus s'elegrein d'astgar beneventar vus en il curtin dalla Villa.

Biblioteca populara Disentis/Mustér e contuorn

Pigniel da Nadal da cudischs cun caffè d'advent dumengia, ils 29 da november 2015, dallas 14.00–17.00 en la Biblioteca populara Disentis/Mustér e contuorn. Tier nus saveis vus admirar igl emprem e sulet pigniel da Nadal dalla Surselva ch'ei vegnius creaus ord cudischs. Leutier purschin nus a vus in sitg e petta. Vegni sperasvi e gudignei tier la concorrenza in canaster da surpresa «Ursin».

Nus selegrein sin vossa viseta.

Biblioteca populara Disentis/Mustér e contuorn
